

საჩხერის მუნიციპალიტეტის საკრებულოს

დადგენილება №24

2010 წლის 10 სექტემბერი

ქ. საჩხერე

საჩხერის საპატო მოქალაქის წოდების მინიჭების დებულების დამტკიცების შესახებ

მუხლი 1

„ადგილობრივი თვითმმართველობის შესახებ“ საქართველოს ორგანული კანონის 22-ე მუხლის 1-ლი პუნქტის „ც“ ქვეპუნქტის შესაბამისად, დამტკიცდეს საჩხერის საპატო მოქალაქის წოდების მინიჭების დებულება (დანართი 1).

მუხლი 2

ეს დადგენილება ამოქმედდეს გამოქვეყნებისთანავე

საკრებულოს თავმჯდომარის

მოვალეობის შემსრულებელი **ზ. იაშვილი**

დანართი 1

საჩხერის საპატო მოქალაქის წოდების მინიჭების დებულების დამტკიცების შესახებ

ეს დებულება განსაზღვრავს საჩხერის საპატო მოქალაქის წოდების მინიჭების სამართლებრივ საკითხებსა და მათი განხილვის წესს.

მუხლი 1. ზოგადი დებულებები

1. საზოგადოების სულიერ, მორალურ, სოციალურ, კულტურულ და ეკონომიკურ პროგრესს განაპირობებს საზოგადოების თითოეული წევრის ღვაწლი, მისი ცხოვრების სტილი და საქმიანობა, რაც განსაზღვრავს მის ადგილს საზოგადოებაში და საზოგადოების დამოკიდებულებას მის მიმართ. საჩხერის მუნიციპალიტეტის „საპატო მოქალაქის“ წოდების მინიჭება გახდება ერთგვარი ხელშემწყობი ფაქტორი ღვაწლმოსილ პიროვნებათა დამსახურების აღიარებისა და მომავალი თაობების ღირსეულად აღზრდისათვის.

2. საჩხერის მუნიციპალიტეტის საპატო მოქალაქის წოდება შეიძლება მიენიჭოს როგორც საქართველოს, ასევე მსოფლიოს ნებისმიერი ქვეყნის სრულწლოვან მოქალაქეს, განურჩევლად ეროვნებისა, სოციალური ცენზისა, საზოგადოებრივ-პოლიტიკური შეხედულებისა და რელიგიური აღმსარებლობისა, თუ მისი მოღვაწეობა და გაცხადებული იდეები მიმართული არ არის საქართველოში დამკვიდრებული კულტურული ტრადიციებისა, ზნეობრივი ეთიკური ნორმებისა და სულიერი ცხოვრების წესის წინააღმდეგ.

3. საპატო მოქალაქის წოდება შეიძლება მიენიჭოს საჩხერის მოქალაქეს, განურჩევლად ასაკისა, სქესისა, ეროვნებისა და რელიგიური აღმსარებლობისა.

4. საჩხერის მუნიციპალიტეტის საპატო მოქალაქის წოდება ენიჭება პიროვნებას საჩხერის წინაშე განსაკუთრებული ღვაწლისა და დამსახურებისათვის, საგანგებო ვითარებისას გაწეული უანგარო სამსახურისათვის, რომლის საქმიანობა და აქტიური ცხოვრებისეული პოზიცია სამაგალითოა საჩხერელთა თაობებისათვის.

5. საჩხერის საპატო მოქალაქის წოდება დასტურია: საჩხერის მუნიციპალიტეტის ეკონომიკის, განათლების, მეცნიერების, კულტურის, ხელოვნების, სპორტის, ჯანმრთელობის დაცვის, ბუნებათსარგებლობის და ეკოლოგიის, შემოქმედებითი, საზოგადოებრივი და სულიერი ცხოვრების განვითარებისათვის, აგრეთვე ადამიანთა უფლებებისა და თავისუფლებებისათვის, უანგარო სიქველისა და სიმამაცისათვის, პატივებისა და აღიარებისა.

6. საჩხერის საპატო მოქალაქის წოდების ჩამორთმევა დაუშვებელია, გარდა განსაკუთრებული შემთხვევებისა, რასაც საქართველოს კანონმდებლობიდან გამომდინარე წყვეტს საჩხერის მუნიციპალიტეტის საკრებულო.

მუხლი 2. საჩხერის საპატო მოქალაქის წოდების მისანიჭებლად კანდიდატურის წამოყენება

1. საჩხერის საპატო მოქალაქის წოდების მისანიჭებლად კანდიდატურის წამოყენების უფლებამოსილება აქვს დადგენილი წესით რეგისტრირებულ:

- ა) საზოგადოებრივ, პროფესიულ და შემოქმედებით კავშირებს და ორგანიზაციებს;
- ბ) სპორტულ ორგანიზაციებს, გაერთიანებებს;
- გ) საპატო წოდების მქონე მოქალაქეთა ჯგუფს;
- დ) მუნიციპალიტეტის საკრებულოს თავმჯდომარეს, მუნიციპალიტეტის გამგებელს.

2. საჩხერის საპატო მოქალაქის წოდების მისანიჭებლად კანდიდატურის წამოყენების უფლებამოსილი პირები, კანდიდატურას წარუდგენენ საჩხერის მუნიციპალიტეტის თვითმმართველობას, რასაც წერილობითი სახით თან უნდა ახლდეს:

ა) საპატო წოდების მისანიჭებლად კანდიდატურის წამოყენების უფლებამოსილი ორგანიზაციის ან პირების რეკომენდაცია, სადაც უნდა წარმოჩინდეს საპატო წოდებაზე წარდგენილი კანდიდატურის ღვაწლი და დამსახურება;

ბ) ბიოგრაფიული და დემოგრაფიული ცნობები;

გ) კანდიდატურის ღირსების, ღვაწლისა და დამსახურების ამსახველი, საზოგადოებისათვის უკვე ცნობილი, ან საპატო წოდებაზე წარდგენის დღემდე უცნობი დოკუმენტალური და სხვა სახის მასალები;

დ) შუამდგომლობას თან უნდა ერთოდეს წარდგენილის პირადობის მოწმობის დამადასტურებელი დოკუმენტის ქსეროასლი, ორი ფოტოსურათი და წარდგენილის წერილობითი თანხმობა;

ე) დასახელებული კანდიდატების შესახებ ცნობების შეჯერებას და განხილვას აწარმოებს საჩხერის მუნიციპალიტეტის საკრებულოს ჰუმანიტარულ საკითხთა კომისია;

ვ) კომისიას უფლება აქვს მოითხოვოს დამატებითი ცნობები (მონაცემები) „საპატო მოქალაქის“ წოდების მინიჭებისათვის წარდგენილი კანდიდატის შესახებ;

ზ) კომისია კანდიდატის შესახებ გადაწყვეტილებას იღებს კომისიის სხდომაზე დამსწრე წევრთა ნახევარზე მეტით და დასკვნა შეაქვს განსახილველად საკრებულოს ბიუროზე;

თ) კომისიის დაკვნას იხილავს საკრებულოს ბიურო და მიღებული გადაწყვეტილება შეაქვს საკრებულოს სხდომაზე დასამტკიცებლად.

მუხლი 3. საჩხერის საპატო მოქალაქის წოდების მინიჭება

1. საჩხერის მუნიციპალიტეტის საკრებულო განიხილავს ბიუროს გადაწყვეტილებას წარმოდგენილი კანდიდატურებისათვის საჩხერის საპატო მოქალაქის წოდების მინიჭების შესახებ.

2. საკრებულო ღია კენჭისყრით წარდგენილი კანდიდატებიდან ამტკიცებს არა უმეტეს სამ კანდიდატს.

3. საჩხერის საპატო მოქალაქის წოდების მოწმობის, დიპლომისა და მედლის გაცემა ხდება წელიწადში ერთჯერ საჩხერის ტრადიციულ სახალხო დღესასწაულ „აკაკიობის დღის“ ზეიმზე. გამონაკლის შემთხვევაში ეს პროცედურა შეიძლება ჩატარდეს ნებისმიერ დროს.

4. საჩხერის საპატო მოქალაქედ არჩევის საზეიმო ცერემონიალს ესწრებიან: საკრებულოს თავმჯდომარე, მუნიციპალიტეტის გამგებელი, საკრებულოს წარმომადგენლები, აღმასრულებელი ორგანოს წარმომადგენლები, საპატო მოქალაქის წოდების მქონე პიროვნებები, ჟურნალისტები, გამოჩენილი ადამიანები, პროფესიული და საზოგადოებრივი ორგანიზაციის ხელმძღვანელები, მოწვეული სტუმრები, საპატო მოქალაქედ ასარჩევი პიროვნებების ოჯახების წევრები, უახლოესი მეგობრები და სხვა ნებისმიერი დაინტერესებული პიროვნებები.

5. საჩხერის მუნიციპალიტეტის საკრებულოს თავმჯდომარე საერთო სახალხო ზეიმის – აკაკიობის დღეს ხსნის კონვერტს და საზეიმოდ აცხადებს საჩხერის მუნიციპალიტეტის საპატო მოქალაქეს (მოქალაქეებს).

6. საჩხერის საპატო მოქალაქეს ამ წოდების მინიჭებისას გადაეცემა მოწმობა, დიპლომი და მედალი.

7. მოქალაქეს (მოქალაქეებს) საპატიო წოდების მინიჭების დღეს გადაეცემა ფასიანი საჩუქრები ან ფულადი ჯილდო დადგენილი წესის შესაბამისად.

8. საჩხერის საპატიო მოქალაქის წოდება შეიძლება მიენიჭოს წელიწადში არა უმეტეს სამ პიროვნებას, გარდა საგანგებო შემთხვევებისა, როდესაც მუნიციპალიტეტის საკრებულო მიზანშეწონილად მიიჩნევს განსაკუთრებული დამსახურებისათვის სამზე მეტი ადამიანისათვის ერთდროულად საპატიო მოქალაქის წოდების მინიჭებას.

მუხლი 4. საჩხერის საპატიო მოქალაქის წოდების მქონე პირის უფლებები

1. საჩხერის მუნიციპალიტეტის საპატიო მოქალაქის ცხოვრებისა და მოღვაწეობის ადგილის მიუხედავად, საჩხერის მუნიციპალიტეტში სარგებლობს ყველა იმ სიკეთითა და შეღავათებით, რითაც სარგებლობს საჩხერის მუნიციპალიტეტში მცხოვრები ყველა მოქალაქე.

2. საჩხერის საპატიო მოქალაქე უფლებამოსილია:

ა) მონაწილეობა მიიღოს საპატიო სტუმრებთან შეხვედრებში, დიალოგებში, დისკუსიებში, მუნიციპალიტეტის საკეთილდღეო ღონისძიებათა შემუშავებაში;

ბ) საჩხერის მუნიციპალიტეტის ადგილობრივი თვითმმართველობის წინაშე დააყენოს საკითხი ნიჭიერი, უნარიანი და კეთილსინდისიერი საჩხერელის თვითრეალიზაციის ხელშემწყობი პირობების შექმნის თაობაზე.